

Christian Meivah

November - December, 2014 Lhani seh thuso

Private Circulation

Kipana Thupha nang dia

2014 kum christmas ahung kit tai. Koi dia hung lhung ham ? Nang dia hung lhunga nagel hinam, ole midang dia nakoi em ? Vannoi a Kipana Thupha hung lhunni ahin, iti nakipapi nah em ? Ole dukandar ho kipa banga kipah nahim ? Ama ho kipana chu, christmas lai-a sum mube ding chu bou ahi. Eihon jong kumhei, golnop, kipa nikho mai mai a ilah ule phat mansah bep ihuive.

Luke 2:1-20 in, Kipana Thupha hung lhunni, ahisah-e. Jan lai-in kelngoi ching ho koma vantil khat ading bangleh in, avel asalvah in, kelngoi ching ho chu akichauvin, vantil chun, kichah hih un, ... hatah a nakipana diu Thupha (Good News) kahin pohpeh uve, anati. Hi che hi Christmas masapen kimanna ahin, hichu hou-in na akibolpon, lou jaova anakibole. Hiche Thupha hi thempu ho, hou lamkai ho, ahiloule Pharisee ho ana kiseipeh masapen le kilom tah ahi. Idia Vantil chun kelngoi ching ho joh anaseipeh masat pen hintem ? Ajeh chu ama ho chu, thu akiseipeh tengle alung kot hong jeng diu ahijeh ahi. Isei ngai lei lou ding koma ima akisei nomji poi.

Alung kot hong nom ho Ki pana Thupha chang diu ahi. Idia Jesu jan-a penga, kelngoi ching ho jong jan lele-a kisei peh-a hintem ? Ajeh chu mi lungjing, mi genthei ho, khojin muthimin atom ho dia Kipana Thupha ahi. Nangma jong hitobang a lungjin lungdongna leh pohgih nei nahile Christmas a Kipana Thupha hi phaten kisanin !

Pathenin David henga la pha bep (Psalms) anapeh chu janlai ahi. Bethlehem a Jesu pen chu janlai ahi. Jesu pen thu kelngoi chingho kisei peh pet chu janlai ahi. Ilung adon teng lungjinna akinei in, muthimin ei tom abang jie. Jesu hi muthim lah-a umho henga Kipana Thupha pea pang ahin, muthim salvah ahi. Itih a jong kichai tih neilou, mihemte Kipasah jing chu ahi. "Jesu Christa chu janhi, tuni, chule tonsot in abang ahi jinge" (Heb. 13:8). Na-dia phat tin na hinga, abang bang hia Jesu hi, na ki panpi sah jing hinam ?

Vannoi a Jesu pen masangin miho kichatna leh lungjin lungdongna in ana dimui. Jesu a kona Kipana Thupha anei jouvun, agin diu ima aum tapoi. Jesu neite chamna leh kipana hinkhon aumpi jingui.

Christmas nia vantil thusei

Numei khangthah khat in nao avop in, chapa khat anei ding, chule amanun amin chu Immanuel asah ding ahi, tin Isaiah 7:14 a aki sune. Vo Bethlehem Ephrathah, Judah gama khoneo pen, Israel chung a vaihom dingpa nanga kona peng ding ahi, tin Micah 5:2 a aki sune. Hiche thuho mihon anatahsan chu aphot alhin phat in ahung dih tan, chule themgao thusei ho aseil bangun ahung soh tai.

1. *Vantil chun*, "Kicha hih un" anati. Ajeh chu Christa pen masang chun miho kichatna ding ana tame. Rome lamkai ten mipi hung kiphin ding ham tin ana kichan, chule mipi ma chun Rome thunei vaipo ho ana ging ui. Sadducee hon Pharisee ho ana kichauvin, chule amani chu ana kigingmo toi. Muntina mihem ho lungthima, kichat, tijat, kigintona, le kiginmo tona chule kitahsan lel to na ana dime. Ahinla Jesun, "Kicha hih un, hon lhom ho" anati (Lk. 12:32).

Tunin, vannoi leiset mihem ten, igin diu itam sah un, kichat in imah thah tauve. Vannoi-a ima jouse iki chauve. Ahinla igin pen diu Pathen vang ikicha pouve. 1 John 4:18 in, "Ngailut sunga kichat aumpoi" ati. Jesu tahsan jeh in Pathen ngailutna akichang jin, Pathen ngailut-te chun kichatna aneipoi. Ipi nakichat lai ham ? Nakhonung ding nakichat em ole thi ding nakichat ham ? Jesu bel

2

le chun Aman nahoidam ding ahi. Solchah Paul in, "Vo thina, nagaljo na ipi ham ? Vo lhankhuh, namide na" hoiham ? (1 Cor.15:55) ati. Jesu neite henga kichat ding aumpoi.

2. *Vantil chun*, "Nangho dia ha chang paa kipana Thupha kahin poh peh nahiuve" anati. Hiche Thupha hi vannoi mi jouse dia ahi. Kon ahin pohlut ham ? Jesun, Pathena kona ahin poh ahi (Lk.2:10). Thupha chu ipi ham ? Satan thahat jona Pathen tha chu ahi. Pathenin hiche jona tha chu, angailut mihemte apeh nom ahi. Thupha hin kichatna khela kinepna mi apeh ahin, kimudana khela lung setna mi apeh ahin, kilosetna khela midang hepina lungthim apen, them mo ngaidamna jong apei. Hijeh hin mihem din Thupha mong mong ahi.

Hiche Thupha sunga hin, mi te lungdongna ho kipana'n akhelin, kibung khenna chu kipumkhatna in ahin khelin, lunggim jeh-a kun kun khelin mai lhaisela umtheina mi apei. Jesu tahsan ho dia lungdon lungjin bei ding kitina vang ahapon, ama vang lungdon lungjinna muna jong Jesun eipan piuve, tina ahi. Hichu vantil in mijouse dia Kipana Thupha ahi atia, Christmas masapen nia ana phondoh ahi. Nadei lou ham ?

3. *Vantil chun*, "Tunin nangho din David khopia" kiti khat jong ana sei-e (Lk.2:11). Hikoma 'nangho din' kiti hin, nang chu naseina ahi. Nang dia Golgotha a cross a kikhai

lih Jesu ahi. Mihon achil aset khum un, tot nopnan anei-un, hiho chu Jesun thip beh-a, nang phatchomna dia ana thoh ahi. Nahet them nah em ? Nang na-it jeh-a athisan long lha anahi. Akeng teni le akhut tenia thingkil lentah tah kikhen lut chu, koi ding ham ? Nang ding ahi ! Nangin nathoh hile najou na dem ! Ahinla aman Pathen koma, “Pa, amaho hi ngaidamin” anatin, Pathenin ama bol gentheite angaidamna din ana thum nalai-e (Lk.23:34). Chule leiset-a ahung lona akin achaisoh hetna in, cross a konin, “Ijakai aki bulhit tai” (Jn.19:30), tin jong ana same.

Vannoi leiset-a muthim in alonkhum, suhna ding helou te henga, “Keima hi Lampi le Atah chu le Hinna chu kahi” (Jn.14:6) anati. Satan thaneina hiche leiset-a eiho din Jesun Hinna Lampi, eipe tauve. Kipah in, Jesu thangvah in. Solam miching ho chun, Christmas kipana in Jesu henga sana, bego, myrrh ho anapeuve. Nangin ipi napeh ding hitam ! Jesun ahinna nang din apei. Tunia Jesun nanga kona adei pipen chu nalungthim chu ahi, pejengin ama thu thu in mangin. Christmas masapenni chun Pathenin achapa Jesu eina peuve. Tukum Christmas a nangin ipi chu Pathen napeh ding hinam ? Natahsa le na lhagao chu Pathen pen ! Nalung kot hong lenin chule Jesu lut sah in ! Jesu nalung sunga alut nome. Jesu nung jui dia nakigel luh hitam ? Kino loi in, da lhah in umkhan nate ! Rev. 3:20.

Chamna hi ipi ham ?

Lengpa khat in agamsunga milim jihthem ho henga chamna kiti hi ipi ham, het theina din milim hin jih un, athem pen kipaman kapeh ding ahi anati. Milim tamtah ahinjih ui. Lengpan hiho chu aven ni chu ana lheng doh-e. Khat chu ahile, twi chat louhela vei dop (pukhri) khat ahi. Twi veina vela chun, mol ho hoi keichan aumun, lungmon mon aum in ahi. Mol chungga chun, van lim aki jih in adum jen jengin chule meilhang phabep in atome. Mi tampin hichu *chamna* lim mongin anamui.

Milim anina a chun mol aki jih in, mola chun ima akeh pon, mol chu atong chel chulin, mol chungga van lim aumin, kolphe phetpet ahin, go jong ajun ahi. Mol pang lama chun akohom khat aumin, ako sunga chun vacha pi khat in bu akisah in, nom tah in lung mong selin abu sunga ana touve. Mola konin twi hatah in ahung longlhan, ahinla vacha bu chungga chun achupon aki kholha pai pai in anahi. Twi haam gei gui-a alonlhah vang chun vacha pi chu abua chamna neitah in ana touve.

Lengpan hoijoh chu alheng tadem ! Lengpan milim teni chu ave ven aninapa chu ana lhengdoh tai. Chamna kiti hi, boina bei, a-eo bei, suhboina bei chu ahapon, hiti ho jou se lah-a, lungmonga, lung-ola, lung neng tah-a um chu chamna tahbeh ahi, tin lengpan ana sei-e.

Mary'n henge, anati

Vantil Gabriel in nungah theng Mary ana kimupia, nao na vop ding, nachapa min Jesu nasah ding, ama chu vannoi huhhingpu hiding ahi, tin ana sei-in ahile Mary chun, jinei loulai-a nao vop ding chu adat mon, vantil henga, iti hithei ding ham, tia aseile vantil chun Pathen thilbol theina chun na ahintoh ding ahi, tin adonbut in ahileh Mary chun, achutile ‘henge, kanome’ tin ana donbut tai (Luke 1:26-38).

Mary chun ‘henge’ atile ki chai jeng ham ? Ahipoi. Jesun jong Pathen henga ‘henge’ anatin, nao senin ahung penge. Ani lhonin van Pathen thilgon chu anom lhone. Ei ho jong Pathen thilgon toh ikidou lou diu ahi. Pakai Jesu ahung pena, Kipana Thupha aki seiphong chu ama dia ipi phachom nam ? Leng kahi atile alenggam hoikom koma uma, agam chu ite teham ? Thu alhangsap a kona mi ijat ana kiphin doh em ? Seijui 12 anei vang a amaho chun idia anatahsan louvu ham ? Ana adamsah, mi chonse ho toh an anehkhoma, thilpha chujat abol vanga min idia atha hintem ? Calvary mola cross a akhailih uchu, thilpha abol ho jeh ham ?

Jesu pen geldohna Christmas ahung kit-e. Iti ikigin um, vannoi huhhingpu lamto dia ikiginu hia hinam ? Ahiloule thing cross iput sah diu ham ? Nang dia hungpeng

ahi, tia nasan ding hinam ? Von thah thah iki choh-a, in ima isutheng uva, hou-in hihen in hijong le ijep hoi uva, ithen sah bang uva, eima eima lung sung jong ithen sah nomu hinam ? Mary in Jesu apensah tobanga eihon jong ‘henge Jesu ka lung sunga hung peng in’ iti nomu hinam ? Kigel phaute. Christmas hi golnop ahipoi. Jesu toh kinai jepna joh ahi.

Tuchung Christmas a hi, Jesun nalung sunga kalut nome, ahin ti kit ahin, ‘henge, kanome’ nati ding hinam ? Midang hon imelu avet teng ahoi-a imuna diuva, dukan a kona kijep hoina ho iki choh uva, polam hoina ikhohsah bangun, sunglam hoina jong khohsah ute. Sunglama um lunghan, gitlou, engset, thangset, phulah, mi vetda kiti ho lungsung sunen ho, lungsunga chensah sangin Jesu chenna thei ding joh in, ilungu sutheng taute. Nasung lama avom, anen beh ho kisuh thengin, Jesu henga, ‘henge, kanome, kalung sung a hung lut in’ tijo le chun Pathen nachunga kipah lleh inte.

Nasung lam le napolam nahoisah nomle Jesu koulut in ! Khat vei seh, ‘henge, Jesu’ tin hichun na hinkho pumpi akhela, nasopi na sanggam ho leh nachen khompi ho lungsung ho jong akidan sah-a, ama ho lung jong akhel ding ahi. Hichu Christmas dihtah chu ahi. Mary in khatvei seh, ‘henge kanome’ atile vannoi miho phatchomna aseidoh tai. Nangin jong chuti chun bolin !

Jesu hetchet ding

Ps. 118:25-26, Mat. 21:1-16. Pathen chapa Jesu tahsan dana kisei miho abonchan kisim leh, vannoti-a houmi lah-a atampen hitante. Ahinla, Jesu phatecha he chena, chule tahsan le akinbol ijat ahidem sei hahsa tah khat ahi.

1. *Jesu tahsan phongdoh masa Peter* : Jesun akou seijui 12 lah-a Peter in Jesu atahsan aphondoh chun Jesu ana kipah-e. Peter in atahsan Jesu chu, a-it jeh chun huhdoh dia agot chu, Pathen thilgon hepha louva atahsan ahi akihei. Peter in, achainan, Jesu aseilep tan, kinepna bei-in ajamin, ahivang in Jesun ahung kimupin atahsan aphudet peh-e.

2. *Israel ten Messiah hung ding angau* : Mihem chonset-a athi phat in, Pathen thilgon dung jui in, Pathenin achapa Leng (Messiah) hung pen ding ana seipeh masa chu ana penge (Gen.3:15). Pathenin aseil bang chun Jesu hung pen ding Mary koma vantil in ana sei-in ahi (Lk. 1:30-38). Bible hegil pen, solchah Paul in, Pathen tepsa, Israelte nga jing Leng (Messiah) chu numei sunga apen aseichen thei tai (Gal. 4:4).

3. *Christian ten itahsan nau det sah ding* : Israel ten ananga jingu Leng (Messiah) atahsan pouvin, japin Jesu chu, “Galilee gam Nazareth khoa hung kon themgao Jesu ahi” atibep un anahi (Mt. 21:11).

Leiset a hin, Jesu tahsan dan jat chom chom um jongle, Peter tahsan dihsaa kigel pan jong aseilep thei in, tahsan hetchet lou jeh jong hia ahi. Peter bana, tunia Jesu tah sana kisei, eiho Christian jousen itahsan nau iphudet jing diu angai lleh-e. Pathen chapa Jesu tahsan hi semtila pat Pathen thilgon ahin, agon banga chonse a thisa mihem koi hileh atahsan jouse Lhagao apeh a, cho hing dia Jesu mihema hung peng, chonsete thoh ding jouse athoh chai a tonsot-a hinkhomp di dia eikou jing uhi sumil poute. (Dr. T. Lunkim)

Jesu hungloi tading

Jesu hung kit dinghi nanging iti nagel em ? Hung dia nakoi em ? Ole ahung kit dinghi natahsan jou lou ham ? Natahsan loule vang ahung nikho leh nangma themmo na chan ding ahi. Phaten kigel phan, tu hi kigin phat tah chu ahi !

Mithengte kilhen doh phat (Rapture) nikho hi naimonga ahitai. Rapture hi thu kidang tah, thuguh thu ki-im, khat ahi. Anikho le aphot tah jong koiman aheth lou dia kiseisa ahi. Koi themgao, koi lhagao mi, chule Jesun jong aheth lou ahi. Pathenin bou akihet ahi. Lekhabua kona simhat a simdoh thei jong ahipoi.

Geisang nasah em ? Kum 2000 val kingah taa, ageisang bouve nati em ? Mihem din geisang nante, Pakai din ageisang naisai poi. Pakai

akhongai sot hi amihepina ahi. Mi amangthah aum louna dia khongai sot ahi (2 Pet. 3:9). Noah chun ibol a kum 100 jen kong asui ham ? Mi hem ten lung aheina diuva khongai sot ahi. Ahinla twisang let gei chun, koiman athu angaipon, lung ahei pouve. Miho chun aneuvin, adonun, akicheng un, akichen sah un, nom tah in ana hingui. Twisang ahung let phat in, abonun athigam tauve (Gen. 7:6). Jesun, hiche Lenggam Kipa na Thupha hi vannoti pumpia kihil lhang ding, chutah lebou vannoti leiset kichai ding ahi, anati (Mat. 24:14).

Bible a Rapture : Vanlai jol a mihem chapa melchihna hung kilang ding (Mat. 24:30), Pakai chu amatah toh, a-ogin toh, vantil pipu ogin toh, Pathen sumkon gintoh ki thoa, vana kona hung kumlha ding (1 Thess.4:16-17), veuvin ama ... mit jousen amu diu (Rev.1:7), van lai jola meilhang lom toh kilhon in, Mihem Chapa tobang khat ahunge (Dan.7:13), tia kisuna konin mitheng te kilhen Rapture thu iheuve.

Hiche nikhoa hi Jesu leiset chungahung kumlha louva, vana mei lah-a uma, mit tinin amua, vantil ten sumkona eihin kou diu, chutengle eiho ana tahsan ho chu, mit phet kah louva Jesu toh vana kimuto dia, ilen tou loi uva, akoma ium diu ahi. Na tha nomlou ham ? (1 Thess. 4:17). Hijeh chun sopi, hiche Rapture ki neppi joulou lai christian nahi khahle avangse nahi. Kigel phan, tunin !

Hb. La No. 113, “Alhen chomte kikhop nile a-inu van chung gama, chua min kikouna sunga ka um ding” kiti la hi, nahina kigel doh in sa-in ! Lathah No. 139, “Pakai ogin khu ngai-uvun, leiset-a miten, ahungna ding ni anaitai, itoh gau kem lou, hung tei ding, hung tei ding, van huikong theng chungah, aloupi aphon kichai niteng; aman alhen chomte apui tou niteng chule, adalhah te chengse vang chu gim genthei thoh ding” kiti la jonghi nangma dia kisa in gelin lang sa’n, chule i-nati hinam, kigelin !

Mithengte kiti hi pengthah ho ahin, pengthah lou chu van gama lut ponte (Jn.3:3), Jesua them chang ho chu mitheng ahivue (Rom.8:1), thenna neilouvin Pathen amu joupoi (Heb.12:14), nakou pau athen bang in, nangho jong thengun (1 Pet. 1:15), mitheng ho chu, kelngoi nou thisana kisop theng ho ahi (Rev.7:14). Jesu neiho mi pengthah ho chu Pathenin mitheng ati ahi.

Pathenin mi iti ahin lhen ding : Sum hei-a chang goikhom khat kila, khat kidalha ding, louva bungkhom khat kilaa, khat kidalha ding, jalkhun a lumkhom khat kilaa, khat kidalha ding ahi (Mt.24:40). Nupa hihen sopi ucha hijongle atahsanu kicheh, atheng hia chubou kila ding ahi, atina ahijoi. Ijeh inem itile Jesun, akikou atam vangin lhen doh vang lhomcha ahi, ati (Mat. 22:14). Hiche nikho hi kiholmo tona nikho jong hung hi ding ahi. Ajipan

ajinu holmon tin, jinun jipa holmon tin, anun acha holmon tin, anu holmo acha holmo dim intin, kiholmo jeh-a ka nikho hiding ahi. Lathah Bu in, “Adalah te chengse vang chu, gim genthei thoh ding” ati nichu hung hinte. Egypt a kona Israelte Pathenin apui doh jan chun Egypt pumpi ana kap-e. Jesu pen jeh a, Bethlehem le avela naosen kitha jeh in, minu mipate anakap-e. Rapture (lahtou) nikho jingle Jesu heng jon lou sen, ajonho aholmouva kap uva peng diu ahi. Ajeh chu *Rapture* nikho leh hetman louva mithengte chu lahtouva um jeng diu ahi. Rapture phatle lahtou-a napan nomlou leh tun, nadu du nen lang, nanop nop in chonin lang, nadei dei in hinkho mangle chun, Rapture nikho leh nang jong kap tan nate. Hijeh hin, Bible in kiging jingin umum, ei tiuve.

Iti kigin ding ham : Soh kiging jinga uma chu anunom ahi (Luke 12:37). Kiging jingin umum, na Pakai itih-a ahung ding nahepoi (Mt. 24:42). Gucha itih-a ahung ding nahepoi (Lk. 12:39). Iti ikigin diu ham ? Munchom khat-a nache ding teng iti nakigin em ? Hibanga chu Jesu lamto dia iti nakigin ding ham, kingai ton, limgeh chan umin.

Phasa dema um ding : London ham America hama che ding itile, ticket le visa ho kingaito masat angai-e. Hiho chu akingaito joule ivon ho suhtup ding, eima jong nat le sat neilouna dia kigin ding ahi.

7 Chule kongleng ahung tengle asunga lut-a toujeng ding ahi. Hiche banga chu van gam chetheina ding ticket ipi pi hintem ? *Khatnaa*, lhatdoh nikhoa dinga Lhagao mohor naki nam nau, Lhagao Theng chu lung phatmo sah hih un, ati (Eph.4:30). *Ninaa*, hiche nia dia chu Pathenin eigon toh uva, khamgahna Lhagao gei-a eipeh-u ahi, ati (2 Cor. 5:5). Hiche hi van gam ticket chu ahitai.

Mitheng te kilhen doh nia vanlai jola meiloma toltouva ium thei na diu ticket ahi. Pentahna Lhagao neilou chu van ticket neilou ahi. Hi che ticket neilou sese chu ada ahi, vanlam vea kap-a peng ding ahivu. *Thumnaa*, kelngoi nou jinei nia aji dingnu chu kigosa dema um ahi. Akijepna ding tonjih ponnem theng sel kipe ahitai. Hiche ponnem hi mi thengte chonphatna chu ahi (Rev. 19:7-8). Kelngoi nou jiding nu chu houbung itiu hi ahi. Houbung chu kigosa dema uma, mithengte chon phatna tonjih ponnema kivona ahitai. Akipui ding ni chu *Rapture* nikho chu hiding ahi. Hiche nikho hi vannoi chonsetna galjo nikho, gal jouho khoppi ni ahi.

Lathah No. 85, - O khopi thah nahoi ngei-e, nasunga galjoute leng, jo lathah ngei asah diu chu, leiset manni dingin, tin akheh ui ... Chuteng kipah thanom in kisanate, kiti la hi geldoh jingute. Iki maginnu angai-e, sopite. Pakai lamto din ki gon !

(Rev. Seikholen)

Mi kidang tah

January 19, 2000 nin Fakhru din Takulla, Bombay a konin New Delhi, gei rail a ana touvin, a ticket chu ahile July 15, 1973 nia ana chohsa ahi. Kum 26 leh lha 6 jouva rail a tou ahi. India Independence kum 50 lhinnaa apan theina dia, Indian Railway Authority a kon a ‘unlimited booking service’ kiti chu akichoh anahi. Delhi chena dia kum 26 le lha 6 jouva, A.C. Chair Car a reservation ticket ana kilah ahin, ‘reservation clerk’ pa chu ana lung dong tai.

Touna ong nam ong louham ti vetna lekha ima clerk pa chun ana neipo lai-in, ahinla Fakhru in hiche lekha chu ana holdoh in, Rs. 120/- in reserve akibol tai. January 2000 a Republic Day, Golden Jubilee a panna din, Rajdhani Express chu aphan chan Delhi anahung-e. Allah in dama kum 26 jouva Golden Jubilee amu sah jeh in anakipah-e.

Indian Railways te chu ama din Samaria Miphapa ahitai. Kum 26 masanga ticket analah lai-a chu A.C. Chair Car ticket ana kilah ahin, tun 2000 hin Rajdhani rail a A.C. Chair Car chu aum tapon, hi che khel chun, A.C. 3 Tier Class joh amui. Rail te chun amahi VIP jenin ana jenun, Delhi a thupi tah in ana lamtouvin, chule Rail te gena muna ni 8 sum leo louvin ana gesah ui. Chu le aina akilena ding ho jong ticket apeuvin, damselin in alhung kit tai.

8

Republic nikho chun ama hi VIP ho touna muna atousah ui. Fakhru hi tun akum 61 ahitan, 2038 teng ama kum hi 100 lhing ding ahin, hiteng chule apenna mun Gujarat a Kaparwaj kiti muna achena din, rail ticket tua kona book bolkit ding atitai.

Damna ding ho

* Mot (Banana) a glucose, fructose, sucrose, fibre aumin, hiho hin mihem thahatna apei. Chule potassium, vitamin B leh C jong aume. Mihem dia phachom atam-e. Na oi asat thethua ahile mot nen. Vitamin B anei jeh in, thajung natna ho din apha. Diabetes nei hon mot aneh le aphapoi.

* Theilhiep, thei-patkong (English a : Carambola / Averrhoa carambola / starfruit) ahin antioxidants, vitamin C le E chule minerals aume. Jaundice veiho anehsah jiuve. Tahsa damtheina ding thil atam nei-e. Oina neh minna jong ahi. Ahinla Kidney damlou ho din aphapoi.

* Vutvai laanphat ahitai. Phalbi lai leh buhse akivei nome. Vut vai khu hon buhse apei, kichih thei-a, vut akhu lah-a ium teng, kamle nah ho ponna khu ji apha.

Meikhu lah-a umho amit uvin athoh joupoi. Eima kihi hen icha hijongle meikhu thoh louva pha ahi. Gari meikhu jong joplut lou ding ahi. Akhu hi mit in aset lon, chule thin le chop jong adammo sah-e.

Pathen thilbol kidang

Malai in, Samaria gama kel nasatah analhan, thilman anakal val in, mihon achau atthat un ana ne khomui (2 Kgs.6:25-7:20). Nupi khat in Israel lengpa henga, agolnu khat anaheh tai. Kagolnun, tunin na chapa kitha hitin, jingle kei chapa kitha hite, atin kei chapa kane doh lhonin, ajingin ama chapa tha ding akitile asel mang tai, tin ana sei-e. Lengpan hiche thu chu ajan nommo asalheh jengin anahi.

Lengpa chun, hiche kel lhah na jouse chu Elisha leh ama Pathen suhmo jeh ahi, hijeh a chu Elisha tha doh ding ahi, tin thu ana lhuhsah tai. Lengpa thupopa Elisha henga ahung in, gentheina hohi Pathena kon ahi, nangma Pathen ahin, nang jong tha ding nahitai, ahungti. Chuin Elisha in, jing tengle thilman jouse hakheh a khe ding ahitai, ana tipeh leh thu popa chun, nathusei chu ahitheu lou ahi, Pathenin van kot ahona asosah ding katahsan poi, anati.

Hiche phat chun Elisha in, ana vetan, kasei hi adih dan namit tah-a namu ding, ahinla ane lah-a napan lou ding ahi, atin anung sol tai. Bible akisim le hiche hi anasoh tahbah in ahi. Ajinga Israel mite chu neh akichu nauva, thupopa hi ana chonlih un, aman thilman bei chu amun, ahinla athipi phat in, ane tapon ahi. Elisha in, namu ding ahiala ane lah-a napan lou ding ahi, ati chu

adih chet jenge. Jankhat kah-a thil man habei-a abei jeng hi, Pathen boltheina kidang ahi. Pathen them gao te thusei jong adih tei jie, ajeh chu amahon Pathen kamcheng aphondoh-u ahi.

Sopi, tunia nangma jong vaichat gilkel in nalonkhum em ? Nakisuh dong em ? Pathen bel in, Jesu phaten tahsanin, alampi namu ding ahi. Seijui ho twi chung konga atou pet chun huisen kong chu aloh ling tan, kong chu twi in achup gotai. Seijui hon amaho Jesu chu anagel doh tapouvin, twi-a lhahlut ding bou chu ana geldoh un, apengun ahuiue. Kong ninglang khat-a touna Jesu chun ahenguva, “Vo, tahsan lhoh ho, ipi chu katahsane, natiu ham ?” tin ana phoh-e. Sopite, tuni hin na tounau kong sunga chun Jesu jong atouve, ti geldoh jingun. Jesu tahsan ho koma Jesu aum jinge. Jesun na genthei nahahsatna jouse aphothip thei ahi, tahsanin. Twi leh huisen athu angaipa, Jesu, thu nangin jong ngai phan. Aman natosetna jousea nahuhdoh ding ahi.

Israel lengpan asol thupopa chun, Pathen mi Elisha thusei ana tahsan lou jeh in, athusei aguilhun ahen, amun, ahinla thil manbei ho chu ana nekha tapoi. Pathen gaosap na ichan khah louna diuvin, Pathen thu pou pou tahsan ute. Pathenin ei lungset jingun, ikhankho diu agel jing jenge. Songlel hih un, tahsan in lang Pathen sei sei ngai-in, lolhing in !

Nui-ji hi Damna

* Tehsepi khat lennaa atou masat pennin, alinglao in, lenna tolpa henga “Dama neipoh lhung ding hinam ?” tin ana dongin ahile pilot pan, “Kicha hih in, tuni gei-a lenna kahin tolnaa koimacha van chung kadalha den hih lai-e” anati.

* Ojapin chapang ho milim ajih sah lai in, aban banin ipi pi lim ajih um, anavei. Chapang khat chun lunglut tah in, ipi lim ham khat ajih in, “Ipi lim najih ham” tia adoh leh aman, “Pathen lim kajih ahi” ahinti.

Ojapin, “Mi koiman Pathen lim itobang ahi helouva” atile chapang chun, “Ana khongai tang-o ! Chomkhat joule Pathen lim kamusah diu ahitai” anati.

* Tehsepu khat mit kivetsah in ana chei. Mit doctor pun, lekha jem avet sah in, “Hiche khu nasim thei em ?” atile “Kasim theipoi” atin, akoi nai heuva “Tunla nasim thei em ?” ati kitle aman “Kasim theipoi” ati kittai. Akoi nai jep-a adoh kit leh kasim thei poi, atikit leuve. Doctor pun, “Namit chu asena lom lome” atileh tehse pun, “Enbon, lekha kisim lou va, iti kasim thei ding ham ?” ahinti.

* Sakappa khat hi jong chaangin anachen ahile theiphung noi-a jong achan pet in ana ihmu doh tai. Ahung khah doh chun, jong tamtah in thei ga chu ana neuvin, aman jong ameithal aholleh jonglen khat in theiphung

bah khat-a atoupin ameile len, mei thal muh chu amapa touna lam chu ahin kosah-a athamlele chun, thal neipa chun akichan ajamtai.

* Pastor khat a pension jouva konin hou-in akai tapoi. Aloipa ‘teacher pension’ pa chun avilin, “Iti dana, na pension vanga hou-in kaita louhel nahim ?” agatileh pastor pa chun, “Nang jong na pension jouva kona school kaikha talou nahi chu !” ati.

* Pope khat hi thidin alum tan, aman angailut tah lamkai len ni ana kouvin, ahung lut lhon chun chibai abolin, chule inchung lam chu thip beh in anavei. Chomkhat jouvin, kathi gei a khat kavei-a chule khat kajet-a natou lhon angai-e, anati. Ima sei louvin thip beh in aumkit tai.

Chuin khatpa chun, “Pu Pope, idia keini neikou baham, nei seipeh lhonin” atileh Pope in alelsa san, “Jesu cross a athi chun migucha ni kikhah-a ana kikhah-e” atin, ahai bei paitai.

* Pasal khat sepai kilahna anapang in, medical exam bolpa chun, atoko chu aven, “Biri nachep em ?” tia adoh leh aman jong, “Meikhu hung pot em ?” tin anadong pai-e.

* America ten vei asan leh, “Excuse me” atiuvin, British ten vei asan leh “Pardon me” atiuvin ahi. Japan ten “Forgive me” atiuvin amavang eimiten vei asan tengle “Kei kahipoi” atiloi jiuvin, ama ham michom ham akihethei jitapoi.

Het-a Phachom

* Los Angeles koma Loma Linda kiti khoa 7th. Day Adventist ho atomlom in achengui. Amahon sa ane pouvin, anche mebou aneuvin, hijeh chun mun danga miho sangin ahin kumkhon pasal kum 10 chule numei kum 6, vel asaubei akiti.

* Christmas thusima solam miching thum ho min hi, Gasper, Melchior, chule Balthasar ahi akiti.

* Scientist hon akeh theilou, abel theilou, akilhep kon thei hai (glass) asemdoh tauve.

* January 2015 leh U.K. a khopi thuma, atol (driver) bei gari lhaipan sah din thilgon aume. Hiche 'driver less vehicle' hi America le Sweden in jong lhaisah pan ding atitai.

* Dubai ten 'air condition city' sem ding atiuve, asunga hi dukan, hospital, hotel, cinema hall, kichepna park, ho lhingset-a um ding ahi. Kho pi lentah sunga hi Car vang kilut sah lou ding ahi.

* Ukraina gama loulhou pasal khat asaan dan foot 8.4 ahin, akum 44 alhinin athitai.

* Atanggol a seidin America a pasal kum 74 velin athi in, chule numei akum 80 velin athi.

* Mizoram a Vairengte khoa cheng mi 3481 hon 2011 a census a chun aminu akhum pouve. Census a chu akipan le Bible a sahem number kiti khu eikipente, ti kichatna anei jeh un, census a chun anapang pouve.

11

* April-August, 2014 sung in Nagaland a, HIV positive natvei mi 838 aholdoh ui. Dimapur district a atampenin mi 427 ahin, Kohima a mi 159, Tuensang 80, Mokokchung 53, Mon 11, Zunheboto 13, Phek le Wokha 17 cheh ahin, Peren 23, Kiphire 34, ahi atiuve.

* India a numei Doctor masa pen - Dr. Anandibai Gopalrao Joshee ahi.

* America a Catholic mi atamjon amaho Father ajinei ding adei ui. Catholic numei som lah-a gup in jong Father jinei ding aphatsah ui.

* Germany ten 'hitech pen' lekha jihna pen khat asemdoh un, chapang ho din apha lhez-e. Spelling leh Grammar dih louva asut teng ule a pen chu hung kithing jia ahi.

* Mit thop ho lamjot ahahdan vet sahna in, 24-8-2014 nin Bangalore a mi 600 in mit singin lam ana jot ui. India a hin mit-thop million 15 aum tai, atiuve.

* Chhattisgarh a kho 50 in, amaho kho sunga christian thu lhangsam ho lutsah louhelna din kinoptona ananei ui. Ahinla a D.C. pauvin ana jadai.

* Ichennau leiset-a gam phabep hi atehtan, agasoh jou tapoi, tin miching hon aseipan tauve. 'Aging country' ho lah-a, Germany, Italy, Japan ho hi 'super aged' ahin, chule Greece le Finland jong hivah ding ahitai. Hi che ho hin 'economic growth' anei louvu ahitai, atiuve.

12

Christian Meivah - sim ho taona akiman peh jinge. Kum 2013 a kona sumto Rs. 100/- ahitan, asim nom jousen hin peuvn, sum napeh lhaa kona kum nakisim peh ding ahi. M.O. hinthot hon Editor kipe ding lekha beh a namin le address suntei un. Editor pu Mobile No. 94355-51080. Manipur le Naga land a sumto pehna thei ho :-

- 1) Mrs. Neijathem Haokip, Haokip Veng
- 2) Ms. Lhingjanem Haokip, KBC
- 3) Mr. Douzahen Guite, Dewlah Land
- 4) Mr. J. Manchong (Lunpu), KCC
- 5) Rev. Lhoukholal, Kangpokpi Missn
- 6) Mrs. Veikholam, Ideal school, ccpur.
- 7) Rev. Seikholen, Medziphema, Nagld.
- 8) Mr. Seikholon Singsit, Kohima.

Hetsah nom ho

* Chapang khat in apa henga, "Idia nungah khat le gollhang khat akichen nileh akhut-a kituhto jilhon ham" tin ana donge. Apan, "Mi ni boxing a akikhetto kona akhut aki tuhto lhon tobang ahi" anati.

* 'Love marriage' le 'arranged marriage' hoijoh phajom tia kidong leh 'suicide leh murder' hoijoh phajom, tia kidong akibange. Ahoi joh chujong ichom hideh lou ahi.

* Kichen kum anitna lhon khat-a ajinun ajipa henga, "Darling, tuni hi ikichen kum nga lhinna ahitai. Ipi bolle hen pham?" atile ajipan, "Ikiphun phun lhon geldohna in, minit ni 'silent condolence' bol hite" atipeh-e.

Christian Meivah
November - December, 2014

PRINTED MATTER

To :

Editor :
Rev. M. Haokhothong,
C/o, Tingjanem Manchong
Nichols High School, Satribari, K.C. Road,
P. O. Rehlabari-781008, Guwahati, Assam.